

Headlines

1. राष्ट्रपति द्रौपदी मुर्मू होरें गी त्रोंणें सेनाएं दे प्रमुखें ऑप्रेशन सिंदूर बारै जानकारी दिती। राष्ट्रपति होरें आतंकवाद खिलाफ भारत दी टकोहदी सफल प्रतिक्रिया आस्तै भारतीय सशस्त्र बलें दी वीरता ते समर्पण दी सराहना कीती।
2. न्यामूर्ति बी.आर गवई होरें मुल्लै दे 52में प्रधान न्याधीश दे तौर पर सगंध लैती।
3. उत्तरी कमान प्रमुख होरें उपराज्यपाल होरें गी जम्मू-कश्मीर दी मौजूदा सुरक्षा स्थिति दा जायजा लैता।
4. मुखमंत्री उमर अब्दुल्ला होरें गोलीबारी करी प्रभावित इलाकें दा दौरा लाया ते घरें गी परतिए बनाने च मदद दा भरोसा दोआया।
5. जनजातीय मामलें दे मंत्री जावेद अहमद राणा होरें बन्ने आहले इलाकें च रौहने आहले लोकें रक्षा लेई बंकर बनाने दी वकालत कीती। मेंढर च गोलीबारी करी होए दे नुकसान दा जायजा लैता।

<><><><><><>

Tri-Services

C.D.S. जनरल अनिल चौहान, सेना प्रमुख जनरल उपेंद्र द्विवेदी, वायु सेना प्रमुख एयर चीफ मार्शल ए.पी सिंह ते नौसेना प्रमुख एडमिरल दिनेश के. त्रिपाठी होरें राष्ट्रपति द्रौपदी मुर्मू हुंदे कन्नै अज्ज मलाटी कीती ते उनेंगी आप्रेशन सिंदूर बारै जानकारी दिती। सोशल मीडिया पोस्ट च राष्ट्रपति होरें आतंकवाद खिलाफ भारत दी सफल प्रतिक्रिया आस्तै भारतीय सशस्त्र बलें दी वीरता ते समर्पण दी सराहना कीती।

<><><><><><>

Tiranga-Yatra

आप्रेषन सिंदूर दी कामयाबी दे बाद भारत दे थेआरबंद बलें दी जित्त ते दलेरी दा जश्र मनाने लेई मुल्ख भरै च तरंगा जात्तरा कड़ी जा'रदी ऐ। इस जात्तरा दौरान लोकें कश जाई-जाइयै उन्दे कन्नै भारतीय फौज दी दलेरी दा गुनगान कीता जा'रदा ऐ ते हर कोई भारती फोज दी इस कामयाब कार्रवाई पर मान करै करदा ऐ। हत्थें च तरंगे झंडे लेइयै लोक देशभक्ति दे नारे लांदे होई पूरे वातावरण च देशभक्ति दा जोश बखेरा करदे ना।

जम्मू च तरंगा जात्तरा कल्लै थमां शुरू होग जेदे च समाज दे सब्भनं वर्गें दे लोक शामिल होडन ते भारतीय थेआरबंद बलें पर मान करदे होई उंदे प्रति अपना आदर, सम्मान ते गौऽ प्रगट करडन।

<><><><><><>

Oath-Gavai

जस्टिस भूषण रामकृष्ण गवेई होरें अज्ज भारत दे 52में प्रधान न्याऽधीश दे तौर उप्पर सगंध चुक्री। राष्ट्रपति द्रौपदी मुर्मु होरें अज्ज राष्ट्रपति भवन च लोआए गेदे इक बशेश समारोह दरान जस्टिस गवेई होरें'गी औहदे दी सगंध चकाई। जस्टिस बी.आर. गवेई होरें न्याऽमूर्ति संजीव खन्ना हुं'दी थाहर एह औहद्धा साम्भेआ ऐ।

<><><><><><>

Army-Commander LG Meet

जम्मू-कश्मीर च शांति ते स्थिरता गी बहाल करने दे जत्तें बारै अवगत करोआने लेई सेना दी उत्तरी कमान प्रमुख लेफ्टिनेंट जनरल प्रतीक शर्मा होरें उपराज्यपाल मनोज सिन्हा हुंदे कन्नै राजभवन च मलाटी कीती। इस मौके पर 15 कोर दे जी.ओ.सी लेफ्टिनेंट जनरल प्रशांत श्रीवास्तव होर बी मौजूद हे। लेफ्टिनेंट जनरल शर्मा होरें केंद्र शासित प्रदेश दी मौजूदा सुरक्षा स्थिति बारै उपराज्यपाल होरें गी अवगत करोआया। चर्चा दौरान हाल दे घटनाक्रम ते खित्ते दी स्थिति दे महत्वपूर्ण पहलुएं पर चर्चा होई।

<><><><><><>

Heli-Service

भारत नै पाकिस्तान बशकार हालिया संघर्ष विराम समझौते दे बाद श्री माता वैष्णो देवी श्राइन बोर्ड नै हेलीकाप्टर सेवा बहाल करी दित्तियां न जेदे नै श्रद्धालुएं दे कन्नोकन्नी कारोबारिएं ते सैलसफा कन्नै जुड़े दे होरनें लोकें बी राहत मसूस कीती। हालात सामान्य होने कन्नै यात्रुएं दी गिनतरी च बल्लें-बल्लें बाद्दा दिक्खने गी लब्बा'रदा ऐ। हून कड़टा ते सांझी छत बशकार हेलीकाप्टर सेवा सख्त सुरक्षा नियमें तैहत जारी ऐ। श्राइन बोर्ड नै रश कन्नै निब्बड़ने ते डाक्टरी सेवाएं दे प्रबंधें दे कन्नोकन्नी यात्रा रस्ते च सुरक्षा बंदोबस्त निगगर करी दित्ते न। यात्रिएं गी सलाह दित्ती गेदी ऐ जे यात्रा लेई ओहू अपनियां टिकटां श्राइन बोर्ड दी अधिकारिक वेबसाइट पर गै बुक करन। आकाशवाणी समाचार कन्नै गल्ल करदे होई श्री माता वैष्णो देवी श्राइन बोर्ड दे मुख्ब कार्जकारी अफसर अंशुल गर्ग होरें आखेआ।

<><><><><><>

CM-Uri Visit

मुख्बमंत्री उमर अब्दुल्ला होरें भरोसा दोआया ऐ जे सरकार नियंत्रण रेखा कन्नै लगदे इलाकें च पाकिस्तानी गोलाबारी करी प्रभावित लोकें गी उन्दे मकान परतियै बनाने च पूरी मदद करोग। उड़ी दे लगामा, सलामाबाद, बांदी ते गिन्गल इलाके दे दौरे दौरान मुख्बमंत्री होरें आखेआ जे पाकिस्तानी गोलाबारी सवां प्रभावित लोकें दी पीड़ ओहू खरी चाल्ली समझदे ते मसूस करी सकदे न। उनें प्रभावित परिवारें कन्नै गल्लबात कीती ते उन्दे कन्नै पूरी हमदर्दी प्रगट कीती।

<><><><><><>

Rana-Mendhar

जनजातीय मामलें दे मंत्री जावेद अहमद राणा होरें कब्जा रेखा कन्नै लगदे इलाके च रौहने आहले लोकें लेई बंकर लाजमी तौर पर बनाने दी जरूरता पर जोर पाया तां जे ओहू बन्ने पारा थवां होने आहली गोलाबारी थवां बची सकन। गोलीबारी करी प्रभावित इलाकें दे अपने दौरे दौरान मंत्री होरें नुकसान दा जायजा लैता ते प्रभावित परोआरें गी हर संभव सहायता दा भरोसा दोआया। उनें सार्वजनिक ढांचे गी ठीक करने, मुआवजा वगैरा आहले कम्मै गी तेजिया कन्नै करने लेई गलाया। फौरी तौर पर कार्रवाई करने पर जोर पांदे होई मंत्री होरें रमानदारी बहाल करने लेई जत्तें ते बन्ने आहले इलाकें च रौहने आहले लोकें दी सुरक्षा ते राहत उपलब्ध करोआने लेई बचनबद्धता जाहिर कीती।

<><><><><><>

Udhampur-Schools

उधमपुर जिले च आम जनजीवन बड़ी तेजियै कन्नै सामान्य होंदा जा रदा ऐ। पिछले कई दिनें तोड़ी उत्थे भारत ते पाकिस्तान बश्कार बनी दी तनोतनी दे चलदे आम जनजीवन प्रभावित हा। हून उत्थै सरकारी ते प्राइवेट सब्बै स्कूल खुल्ली गेदे न जेड़े सुरक्षा चिंताएं करी किश दिनें लेई बंद रक्खे गेदे हे। अज्ज सब्भनें स्कूलें च बच्चें वर्दियां लाए दे पूरे जोश ते उत्साह कन्नै आए दे दिक्खे गो। बच्चे खुश हे जे ओहू हून परतिऐ स्कूलें च अपने दोस्ते-मित्रें कन्नै खेड्डी बी सकदे न ते पढाई बी करी सकदे न।

<><><><><><>

Ramban-Dairy

समग्र डेयरी विकास स्कीम तैहत रामबन च महिला आत्मनिर्भर बना रदियां न। एहू स्कीम पशु पालन मैहकमे आसेआ शुरू कीती गई ऐ। एहदे पर बैंक लोन पर 50 फीसद रियायत थ्हांदी ऐ। लाभार्थी अपने लौहके-लौहके कारोबार कायम करिए लाहू ठोआ रदे न। इनें इकाइयें राएं लोकें गी नियमित ते स्थिर आमदन दा स्रोत हासिल हुंदा ऐ ते ग्रामीण महिला सशक्त हुंदियां न।

<><><><><><>

JKEDI

जम्मू-कश्मीर उद्यमता विकास संस्थान जकेड़ी नै किश्तवाड़ च रैंप पहल तैहत चऊं हफ्ते दा उद्यमता ते हुनर विकास प्रोग्राम शुरू कीता ऐ। विश्व बैंक ते दरम्याने, लौहके ते भलेआं लौहके उद्यमें सरबन्धी मंत्रालय दे सहयोग कन्नै आई.टी.आई किश्तवाड़ च लोआए गेदे इस कार्यक्रम च 30 उद्यमी हिस्सा लै करदे न जिनेंगी कुल 104 घंटे दी सिखलाई दिती जाग। सिखलाई च उनेंगी बपार, कारोबार दियां बारीकियां, उद्यमें दे प्रबंधन, तैयार समेयान दी मशहूरी ते बजारै तगर पुजाने बारै जानकारी बी दिती जाग।

<><><><><><>